

L'invid – teater finel da la 5 e 6vla classa



Il teater finel da la 5 e 6vla classa *L'invid* es gnieu preschanto illa sela da gimnastica da gövgia, ils 24 gün 2021 fin sanda, ils 26 gün 2021 cun grand success e standing ovation.

"Daspö ch'eu vaiva vis in scoulina ün dals teaters dals grands, m'he eu allegreda sün quist mumaint!"

Giulia Pietrogiovanna, 6vla classa

Uschè scu Giulia chi ho giuvo la rolla da Laura Rubacuori tal teater finel *L'invid* pensan bod tuot ils iffauts e lur famiglias da nossa scoula. Noss scolars e nossas scolaras s'allegran già da pitschen da pudair ster sül palc e preschanter il teater finel davant amihs e cuntschaints.

"Quist'istorgia nu schmaunch eu më pü!"

Gian Andrea Caratsch, 6vla classa

Il töch teater *L'invid* es ün proget da tschinch ans chi cumainza dal 2016 cun ün teater e chi chatta sia culminaziun cul teater da quist an cò a S-chanf.

Duonn'Elvira ho rescrit sieu teater eir in ün text in prosa tudas-ch – *Die Einladung* – chi'd es gnieu premio. Ella l'ho tradüt pel mez da rumauntsch obligatoric *Mediomatix* da la 6vla classa ed eir creu per quel üna richa racolta da materiel e metodos per ler l'istorgia criminela *L'invid*. Ün'istorgia cumplexa, misteriusa, cun figüras chi daun da penser.

Cun lavurer düraunt l'utuon cullas duos classas cun quist mez, s'ho vis svelt cha las scolaras e'ls scolars eiran inchantos e fascinós da l'istorgia e da las figüras.

Causa las restricziuns da corona nun eira lönch brich cler scha saregia insomma pussibel da fer il teater finel.

"Que am sfrachess il cour da nu pudair fer ün teater cun quistas duos classas cun scolars e scolaras cun tels duns e talents!"

Elvira Pünchera, magistra, autora e redschissura dal töch

Nus essans grats cha la fin da meg es gnida la nouva dal Cussagl federel cha eir amatuors possan realiser occurrenzas cun public.

Mia rolla am plescha fich bain e que es important. Impustüt scha vainsa poch temp ed as stu imprendder bain il text, as stu incler ed interpreter bain sia rolla. Nus vains eir ün avantag cha nus vaivans quist'istorgia già scu *Mystery Game* pel mez da litteratura, uschè cha savaivans già scu cha las rollas sun.

A me plescha il palc fich bain, quel es fich speciel ed ad ho druvo lönch per al preparar.

Lina Salzgeber (rolla: Lucrezia Della Vipra)

Il temp es sto dimena s-chars eir quist an darcho. Prouvas haun las duos classas gieu pür daspö ils 7 gün! Üna cuorsa da duos eivnas e mez fin tar la premiera. Infra poch dis haun ils scolars e las scolaras imprains lur text – vaira baccuns cun üna lingua pretensiusa – ed ad haun controllo vicendaivelmaing il text, intaunt cha duonn'Elvira ho insceno cullas gruppas scena per scena tenor ün plaun da prouvas.



Il local "prüvo" da la recepziun dal motel "Reposa in pêsch", inua chi capita tuot l'istorgia.

(fotografia: P. Bernasconi)

SCOUOLA

Ün intermezzo da quista cuorsa fich important ho que do in lündeschdi, ils 21 gün 2021. A bunura es gnieu l'actur professiunel Lorenzo Polin per der auncha ün pêr tips e tschegns a noss actuors ed a la redschia.

Il teater *L'invid* es per me ün dals teaters ils pü bels cha vaivans fin uossa. El es divertent, eir ün pô dramatic ed eir s-chiffus, a fo propi s-chif da vzair il palc. Duonn'Elvira ans ho do ün grandischem sustegn, ella ho güdo a nus, ho gieu bunischmas idejas ed ho scrit sves il teater. Il teater es gnieu scrit fich bain ed eir bain inclegiantavel. Culla visita da sar Lorenzo Polin es que ieu auncha pü bain.

Jade Bernasconi (rolla: Glora Viola)

In lündeschdi vers mezdi e zievamezdi es gnieu sar Armon Schlegel dad rtr ed ho filmo las prouvas – il resultat as po guardar tal *Telesguard* dals 24 gün 2021.



Il possessur dal motel, ün schani dubius cun nom Lucifer Baltasar, giuvo da Flurin Thoma. A dretta ün da sieus unics amihs, sieu corv impaglio. (fotografia: P. Bernasconi)

L'inter'istorgia capita i'l motel falamber e giò d'via cul nom dubius *Reposa in pêsch* chi vain mno dal schani singuler *Lucifer Baltasar*. Que chi pera a prüma vista dad esser üna cumedgia i'l ravuogl d'ün inscunter da classa, as sviluppa i'l seguond act ad üna tragedia chi maina a la surfatscha ün'istorgia veglia, bain zuppada e schmancheda.

SCHULE

Per la musica da culissa haun pissero Simon Gabriel, Lina Salzgeber, Jodie Sobeck ed Elvira Pünchera.



Grazcha a nos musicist e nossas musicistas es que sto pussibel dad accompagner las scenas cun musica e tuns adattos a l'atmosfera. Sülla fotografia Lina Margaritta Salzgeber. (fotografia: P. Bernasconi)

Cun bravüra haun ils 16 actuors ed acturas imprains ad inscener ils inscunters sül palc, haun vivieu dapü cu giuvo lur rolla e lascho rir al public, ma eir regalo als spectatuors ed a las spectaturas mumaints inschmanchabels da divertimaint, tensiun, scenas chi daun da penser e mumaints chi vaun suot la pel.



Uschè svelt scu pussibel vainsa preparo il palc per pudair fer las prouvas da teater cun tuot ils requisits e l'ambiant dal motel. (fotografia: P. Bernasconi)

Eau vulaiva già adüna fer il teater da la 5 e 6vla classa. Il palc vainsa eir preparo tuots insembel. Per que vainsa druvo bod duos lecziuns! Eau am giavüsch cha vegnan 100 personas tar mincha rapreschantaziun, perche cha alura guadagnainsa raps per ir in viedi. Eau m'allegr già sül teater.
Maja Meng (rolla: Emilia Müstaila)



Applaus frenetic e standing ovation es sto l'ingrazchamaint dal public. E natürelmaing nu's suos-cha schmancher il cilinder da Lucifer Baltasar. Quel chapè es nempe gnieu implieu cun ün import straminabel. Grazcha fichun!

A d'eira fich bel d'imprender darcho üna vouta ün text. Que am pera interessant cu cha's riva d'imprender uschè svelto e bain eir bger text. Scha's fo ün teater es que scu scha's pigliess üna part da la vita da qualchün e's fess zieva ün teater our da que.
Jodie Sobeck (raquintetra)

Il teater es fich misterius e nun es brichafat listess scu ils ultims teaters. A do eir mordraretchs e personas chi scuvreschan la vardet.
*Mirta Bott
(rolla: Neisa Rigurusa)*

Per me es il teater la pü coola lezcha da quist an da scoula. A me plescha il teater, eir perche ch'eu d'he bger text. Eau m'allegri fich süllas sairedas da teater.
*Gian Andrea Caratsch
(rolla: Sigmund Freudlos)*

Ün assegg da diversas fotografias da nos teater es da chatter sün nos chanel tar youtube.

Cun mincha prouva gninsa pü cunter a las sairas finelas. Eau spet già uschè lösch sün quist mumaint ed uossa è'l cò, eau nu sun bod na buna da crajer. Forsa as craja cha fatschans que be pel viedi, ma ad es eir bel da fer il teater e na be pervi da las rapreschantaziuns, na, eir il viedi es il böt. Las prouvas, trener il text ed alura ils mumaints cha nu vainsa pudieu fer inavaunt, perche cha'ls actuors e las acturas nun haun schmiss da rir. Cler ho que do eir mumaints ch'üngün nu rivaiva pü e nus vains stuvieu fer üna posa. U eir mumaints cha nu d'eirans buns da ster quiets davous il palc. Ma eau d'he il sentimaint cha que vegnan sairas inschmanchablas cun bunas algordanzas.
*Giulia Pietrogiovanna
(rolla: Laura Rubacuori)*

Il teater *L'invid* am pera fich cool e que es bel ch'eu poss giuver a Steivan. Ad es bel cha duonn'Elvira as piglia uschè bger temp per fer il teater. Que am fo plaschair. Il palc es propi speciel e propi s-chiffus. Eau m'he adüna già allegro sün quist teater da la 5 e 6vla classa. Ed uossa è'l co. Che bel!
*Felici Defila
(rolla: Steivan Sumbriva)*

Eau m'allegri fich sül teater! A me pera mia rolla fich divertenta ed eau m'allegri süllas sairedas da teater. Eau m'allegri fich!
*Romina Viletta
(rolla: Babetta Bajedra)*

Eau sun cuntaint cha nus fains adüna ün teater cò a S-chanf. Eau sun fich cuntaint ch'eu d'he clappo uschè üna buna rolla.
*Flurin Thoma
(rolla: Lucifer Baltasar)*

A me pera il teater fich cool ed eau sun cuntaint cha pudainsa fer il teater. Pervi da quist coronavirus nu vessans bod na pudieu fer il teater!
*Gian Andri Feuerstein
(rolla: Giacomo Rubacuori)*

A me plescha il teater fich bain, eir l'inscenaziun. Mia rolla am plescha eir fich bain. Da la premiera d'heja auncha ün pô respet, ma uschigliö am sainti bain.
*Romana Lechthaler
(rolla: Susi Schuschuri)*

A me pera fich bel cha pudainsa fer il teater, adonta la situaziun cul coronavirus. A me plescha mia rolla fich bain ed eau d'he plaschair dal teater.
*Soraya Vicente
(rollas: Enzo Färrari & Fabiola Fuorcha)*